

Date – 14/05/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Chief Minister Pu Lalduhoma'n Mizoram leh Assam state inkarah inlungualna leh thawhhona tha a awm theih a beisei thu a sawi.
2. Supply Department chuan kumin fur chhung atana Mizoram mamawh tur buhfai chhekkhawl ani tawh an ti a, Supply Centre hrang hrang hmun 70 ah buhfai mamawh dah vek tawh anih thu an sawi.
3. Assam sawrkar chuan tun thla ni 26 hian State Legislative Assembly ah Uniform Civil Code (UCC) Bill a pu lut dawn
4. Union Cabinet Committee on Economic Affairs (CCEA) chuan Kharif Crop zawrh hun 2026-27 atan thlai thar hralhna pui tur Minimum Support Price tihpun a remti

<><><>

CM

Chief Minister Pu Lalduhoma'n Mizoram leh Assam state inkarah inlungualna leh thawhhona tha a awm theih a beisei thu a sawi.

Pu Lalduhoma hian Thawhlejni khan Assam Chief Minister atana lak luh Himanta Biswas Sarma chu lawmpui turin Guwahati ah a kal a, Assam sawrkar thar lakluhna ah telin he hunah hian Prime Minister Narendra Modi, Union Defence Minister Rajnath Singh, Union Home Minister Amit Shah leh Sawrkar laipua mi pawimawh hrang hrang bakah State Chief Minister te an tel bawk a ni.

Pu Lalduhoma chuan chanchinbumiten an kawmna ah Assam sawrkar thar lakluhna ah Chief Minister Himanta Biswa Sarma sawmna angin a tel thu a sawi a, a thian tha tak anih thu sawiin state 2 inkarah thawhhona tha zawk a awm a beisei thu a sawi a ni.

<><><>

CHIEF MINISTER : FISH FESTIVAL

Chief Minister Pu Lalduhoma'n Mizoram sangha tharchhuah a pun theih nan sawrkarin theihtawp a chhuah a ti a, Sangha dil neituten hlawk zawka an tharchhuah theih nan tunlai thiamna thar ber ber an hman ve a ngai tih a sawi.

Nimina Dawrpui Multipurpose Hall-a Mizorama Sangha khawitute intawhkhawmna (Mizoram Fish Farmers' Meet) a hmanpui na ah he thu hi sawiin Pu Lalduhoma chuan Sangha tharchhuah kawngah tan lak a ngaih thu sawiin tharchhuah dahthatna tur Cold Storage pawh mamawh anih avangin sawrkarin a ngaihtuah dawn tih sawiin Sangha tharchhuah a pun theih nan theihtawp chhuah an tum thu a sawi a ni.

Fiseries Minister Pu Lalthansanga pawhin thusawiin, Fisheries department mumal zawka kalpui an tum tih sawiin sangha khawi tanpuina kawngah induhsakna tih tawp an tum thu a sawi a ni.

<><><>

MAX SUPERSPECIALITY HOSPITAL

Max Super Speciality Hospital Saket, South Delhi chuan nimin atangin Damdiai Healthcare, Khatla, Aizawlah thluak lam doctor thiam bikrawn theihna, Neurosurgery OPD service an hawng.

Nimina Max Hospital hotuten thuthar thehdarhtute an kawmnaah he thu hi sawiin, Max Hospital-a Neurosurgery Head of the Unit, Dr. Anurag Gupta chu thla tin Nilaini vawi hnihna tlai dar 4 atanga zan dar 7 inkarah Damdiai Healthcare, Khatla, Aizawlah a rawn theih thin dawn a, Dr. Anurag Gupta chuan Max Super Speciality Hospital chu MUHCS nena inthlunzawm a nih thu sawiin, nimina Neurosurgery OPD service an hawn thar kaltlang hian damlo te natna uluk taka endik leh enkawl sak a ni dawn a ti a. Thluak leh hnungzangruh natna te chu enkawl hma an nih chuan tha taka tiham leh theih a ni tih sawiin, Aizawla Neurosurgery OPD an hawn thar chuan mithiamte enkawl na hnuaiah damlote chu him leh chak zawkin an natna enkawl leh tiham kawngah a pui dawn a ti a, zai ngai te pawh Max Super Speciality Hospital, Saket-ah khawl tha leh changkang tak hmanga zai an nih tur thu sawiin, an kalna tur te buaipui sak an ni dawn tih a sawi bawk a ni.

Zawhna chhangin Dr. Anurag Gupta chuan Mizorama thluak lam kaihnawih harsatna nei zingah zangruh natna nei an tam ber tih a sawi a, hei hi a chhan ber chu nitin nunphungah mipuite an chet tam loh avang leh ke an kal tam loh avang te a nih thu a sawi a ni.

<><><>

MONSOON STOCK

Supply Department chuan kumin fur chung atana Mizoram mamawh tur buhfai chhekkhawl ani tawh an ti a, Supply Centre hrang hrang hmun 70 ah buhfai mamawh dah vek tawh anih thu an sawi.

Food, Civil Supplies & Consumer Affairs Department thuchhuah tarlan danin kumin Fur khawchhiat laia khaw thenkhat tlawhpawh harsa leh ei leh bar lakluh harsatna thin khua ten buhfai an tlakchham loh nan buhfai chhekkhawl an kalpui a ti a, Heng khaw hrang hrangten furpui chhunga anmahni chawmtu Supply Centre 70 (sawmsarih)-ah an mamawh tur zat buhfai 1,66,655.90 qtls.(quintal nuai khat singruh sangruk zaruk sawmnga panga leh kg. sawmkua) chu thlen kim a ni tawh an ti a, thingtlang hmun kilkhawr zawka chengte Furpui lo thleng turah harsatna a awm dawnlo tih an sawi.

<><><>

AH&VETY MINISTER

AH&Vety Minister Pu C.Lalsawivunga'n Ranvulh tuten Ran Insurance an ngaih pawimawh theih nan Department in theihtawp a chhuah thu a sawi.

AH&Vety Rest House Selesiha Mizoram Veterinary Service Association Annual General Conference vawi 44 na a hmanpui na ah he thu hi sawiin Pu C. Lalsawivunga chuan National Livestock Mission hnuaiyah Animal Insurance chu ni February ni 10 ah kalpui ani tih sawiin Mizoram chu Ran insurance nei tha ber pawl anni a ti a, Ranvulh tuten an ran te an insure theih nan Department in hma an la zel dawn tih sawiin Department chuan ranchaw ching turin hma a la mek tih a sawi.

Minister chuan Artuia intodelh tura hmalakna Mega Egg production project Thenzawlah kalpui mek chu Arpui nuaikhat leh artui 70,000 thla tin thar chhuahna tur a ni a ti a, kuthnathawktute hmasawn nan sawrkarin theihtawp a chhuah tih a sawi.

<><><>

PHE MINISTER

PHE Minister Prof Lalnilawma'n Lunglei khua ah mumal zawka tui sem anih theih nan Department in theihtawp a chhuah a ti a, mipuiten tui hnianghnar zawk an dawn theih nan hmalak mek ani a ti bawk.

AMRUT 2.0 hmanga Lunglei khawpui tui lakna PIALHLING Impounding Gravity Dam khuah a enfiah na ah he thu hi sawiin PHE Minister chuan Lunglei khawpui chawm tu tur Tlawng lui khuah zawh tawh ani chu lawmawm a tih thu sawiin mumal zawka tui semchuah anih theih nan theihtawp an chhuah dawn a ti a, Lunglei mipuiin tui hniang hnar zawk an dawn theih nan chak taka hmalak anih thu a sawi.

He Tuikhuah hi Rs Vbc4.7 hmanga HS Constraction Pvt Ltd Aizawl ten an khuah niin Meter 13 a sang a ni a, a hnar lamah Km 1.5 a thui chim in tui luan liamna Spillway tha taka siam a ni bawk.

<><><>

CHAMPHAI AR

Thawhlejni khan Champhai Zote khawtlang mipui leh Champhai Zote kiang, Ngur kawna duty Assam Rifles inkarah boruak tha lo a inmun a, buaina lian tham chhuak lovin boruak sa hut hi khawtlang hruaituten an hmet mit thei a ni.

Champhai Zote VCP Pu K Zosangliana hnen atanga thudawn danin Pu Vanlalhruaia Sailo, Zote VC member leh Pu Lalhriatrenga te ram kal haw lam chu Champhai atanga Ngur khaw panna kawngsir, Ngur kawna Assam Rifles duty uniform inbel lo, silai leh Chem keng te chuan lo manin an phuar bet a, Pu Vanlalhruaia Sailo chu kut thlak zuiin a Lû ah hliam tenau a tuar a, Assam Rifles ten an man pakhat Pu Lalhriatrenga chuan an khaw VC Secretary, Pu Lalmuanawma hnenah harsatna an tawh dan chu Mobile phone hmangin a hrilh a, Zote khawtlang thinrim chuan buaina chhuahna hmun lam panin Boruak chhe zawk a thlen hmain khawtlang hruaituten mipui an khap bet thei ta a ni.

He thil thleng avang hian Zote mipui chuan an khaw kianga Assam Rifles in duty post an neih mek chu thiat tur leh he hmun hi chhuahsan nghal turin an phut a. Zote khawtlangin an phutna angin Assam Rifles te hian nizan atangin an bungrua leh thil pawimawhte an thiar chhuak nghal a, Duty Post building leh puanin te erawh chu Champhai Police ten an veng zui dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

FERTILISER

Bairabi Police leh Bairabi North Branch YMA tangkawp chuan vawiin khan Bairabi a Kudam pakhat atangin fertilizer chi khat Urea bag 1867 an man.

Fertilizer (Urea) hi lirthei pathum atanga man niin, an man hlut zawng hi tualchhung rate ah cheng nuai 4.9 a hlu ni a chhut a ni a, Heng fertilizer an man te hi Kolasib Fertilizer Inspector hnenah hlan niin, Kolasib ah phurh chhoh nghal ani a, Driver te pawh hren niin Fertilizer (Control) order 1985 and the Essential Commodities Act 1955 hnuaiah thubuai siam a ni.

<><><>

ASSAM UCC

Assam sawrkar chuan tun thla ni 26 hian State Legislative Assembly ah Uniform Civil Code (UCC) Bill a pu lut dawn. Chief Minister Himanta Biswa Sarma chuan nimin khan State Cabinet meeting hmasa ber an neih zawhin he thutlukna hi a puang a. Pu Sarma sawidanin tun thla ni 21 atanga ni 26 chhung hian Assam Assembly Special session a thu dawn a, he thutkhawmah hian MLA thlan tharte lakluh an ni ang a ti a. Session tawp ni ah hian UCC Bill hi house ah putluh a ni ang a ti bawk..

<><><>

KHARIF CROP MSP

Union Cabinet Committee on Economic Affairs (CCEA) chuan Kharif Crop zawrh hun 2026-27 atan thlai thar hralhna pui tur Minimum Support Price tihpun a remti. Union Information and Broadcasting Minister Ashwini Vaishnaw chuan New Delhi=a Union Cabinet an thutzawhah chanchinbumite kawmin loneituten an thlai thar man man taka an hralh theih nan sawrkar chuan MSP hi tihpun a rel a ti a. Kharif season chhung hian sawrkarin a tum tur chu cheng vaibelchhe nuai 2 sing 6 anih thu a sawi a. Thlai thar metric tonne nuai 824 lei hman an tum tih a sawi a ni.

<><><>

BRICS

Ni hnih awh BRICS Foreign Ministers' Meeting chu vawiinah New Delhi-ah tan a ni dawn. He thutkhawm hi External Affairs Minister S Jaishankar chuan a kaihuai dawn a. BIRCS Foreign Minister te leh Member leh thawhpui ram atangin palai thahnem tak an kalkhawm dawn a. Prime Minister Narendra Modi an hmu bawk ang.

<><><>